

VIII

1314-V-6, Valladolid. Provisión real de Alfonso XI al concejo de Murcia, ordenando que los escribanos no aboguen en los juicios y los abogados en ejercicio no puedan ser jueces ni alcaldes para ver los pleitos. (A.M.M. C.R. 1314-1344, f. 2v).

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Iahen, del Algarbe et sennor de Molina. Al conçeio et hermandat de la muy noble çibdat de Murçia, salut et graçia.

Bien sabedes en commo enbiastes a Diago Gonçalez, uuestro mensagero, a la reyna donna Maria, mi ahuela, et al infante don Pedro, mio tio, et mis tutores, et mostroles uuestra petiçion en que me enbiuades pedir merçed que uos mandase dar mi carta que ningun escriuano publico non auogue nin razione ningun pleito en ayuda de ninguno que quiera demandar o defender por razon de carta o de escriptura publica que el tenga en su poder o aya fecho por su ofiçio; et, otrosi, que ningun auogado que auogue nin razione pleitos o pleito non pueda seer juez nin alcalde nin tenga lugar de juez nin de alcalde ordinario. Et yo, con conseio et con otorgamiento de los dichos mis tutores, tengolo por bien.

Porque uos mando por esta mi carta que ningun escriuano publico non auogue nin razione ningun pleito en ayuda de ninguno que quiera demandar o defender por razon de carta o de escriptura publica que el tenga en su poder por ofiçio o aya fecha del ofiçio; et, otrosi, que ningun auogado non auogue nin razione pleito non pueda seer juez nin alcalde nin tenga lugar de juez nin de alcalde ordinario. Et sy alguno o algunos contra esto quisiere yr o pasar, mando al adelantado que y fuere por mi que lo non consienta et que lo faga asi complir, segund en esta carta de contiene, ca mi voluntad es de lo guardar asi como me lo enbiastes pedir. E el nin ellos non fagan ende al, so pena de la mi merçed.

Dada en Valladolid, seys dias del mayo, era de mill et trezientos et çinquenta et dos annos. Yo, Iohan Miguel, la escreui por mandado del rey e de la reyna donna Maria, su ahuela, et del infante don Pedro, su tio, e sus tutores. Iohan Martinez. Johan Alfonso.

